

14/07/2001

Artis Bollywood serikan konsert amal

KEMUNCULAN artis Bollywood dalam Konsert Amal Antarabangsa Yayasan Sultanah Bahiyah di Hotel Istana, Kuala Lumpur, baru-baru ini, mengundang kemeriahan berpanjangan meskipun ia dipersembahkan secara tertutup.

Aksi rancak dan gaya mempesonakan aktres terkenal Raveena Tandon dan Pooja Batra sebagaimana mereka dalam filem, menceriakan konsert itu, selain barisan penari muda yang didatangkan khas dari India memperlihatkan gerak tari yang cukup menyegarkan.

Raveena tampil berseri moden serba hijau dengan memberi kata sepatah dua memuji penganjuran konsert amal itu dengan berkata: "Saya percaya seni dan lagu dapat menyatukan masyarakat."

Persembahannya memukau apabila barisan penari muncul dengan unggun api diikuti lagu latar secara minus one dalam irama rancak. Kemudian pada akhir persembahan, dia menggayakan aksi tarian Punjabi berpakaian tradisi etnik itu. Aksi mereka menjadi lebih menarik dengan kemunculan replika kuda, telefon, tembikar dan jeritan penarinya.

Pooja dengan pakaian serba hitam terdedah belakang dan perutnya tampil dengan tiga lagu, sementara penarinya membawa bendera yang menjadikan persembahan mereka satu aksi mantap.

Walaupun ditampikan secara miming, aksi mereka yang segar, lincah dan bertenaga itu meriangkan suasana. Semua penonton kelihatan memberi perhatian sambil ada yang menggoyang kepala dan menghentak kaki di lantai hotel.

Penyanyi lelaki dan komposer terkenal dari India yang sudah membuat banyak persembahan di merata dunia, Anu Malik turut muncul dengan barisan penarinya. Kehadirannya juga tidak mengecewakan kerana gayanya juga dengan imej tersendiri. Penyanyi Bollywood lain yang hadir ialah Chunky Pandey.

Selain persembahan mereka, turut diundang dalam konsert itu ialah penyanyi veteran terkenal Indonesia, Irni Yusnita dan Wirda Ningseh, yang mendendangkan beberapa rangkaian lagu popular lama termasuk Bengawan Solo, Jali Jali dan Kau Pergi Tanpa Pesan.

Irni yang berkebayu moden turut menyanyikan dua lagu Inggeris, My Way dan Hello Darling, selain lagu yang dipopularkan Krisdayanti, Menghitung Hari.

Dua penyanyi itu turut menyanyi secara duet untuk lagu popular daerah Minangkabau berjudul Ayam Den Lopeh. Penyanyi dari Hong Kong, Lee Hui Cheng turut beraksi untuk satu lagu berbahasa Kantonis.

Terdahulu, konsert itu dimulakan dengan persembahan kanak-kanak berbakat dari Kedah, Mohd Fadzli dan Farah Wahida yang menyanyikan lagu Seri Kedah, Cindai dan Sri Mersing. Persembahan mereka dijayakan oleh Kombo Kesenian Tentera Darat pimpinan Mejar Mohd Hashim Hamzah.

Sebelumnya, aktor dan pengacara Jalaludin Hassan ditandu empat lelaki memasuki dewan. Dia yang segar berpakaian songket Melayu tradisional lengkap berkeris dan bertengkolok kemudiannya merafak sembah menjunjung duli sambil membaca pantun untuk mempersilakan tetamu diraja memulakan santapan.

Persembahan tarian bintang Bollywood bersama barisan penari mereka memukau penonton, bukan saja tetamu diraja, Sultan Kedah dan Sultanah Kedah, malahan Perdana Menteri, Datuk Seri Dr Mahathir Mohamad dan isteri, Datin Seri Dr Siti Hasmah Mohd Ali turut terpesona dan tersenyum melihat gaya bintang itu.

Hadir sama ialah Raja Muda Kedah, Raja Puan Muda Kedah, beberapa kerabat

diraja Kedah serta Menteri Besar Kedah, Datuk Syed Razak Syed Barakbah.

Turut hadir Pengerusi Yayasan Sultanah Bahiyah, Datuk Seri Tunku Intan Safinaz Sultan Abdul Halim.

Konsert amal anjuran Yayasan Sultanah Bahiyah itu bertujuan mengumpul dana bagi membiayai program kemasyarakatan dan kebajikan. Ia juga diadakan sempena sambutan ulang tahun Hari Keputeraan Sultan Kedah Kedah Ke-73.

(END)